

Ullukinnerup ullup affaa sulinngiffiusalernissaa siunertaralugu Naalakkersuisut qulaajaanissaannik peqquneqarnissaannik Inatsisartut aaliangiiffigisassaattut siunnersuut. Qulaajaaneq periarfissanik assigiinngitsunik qanoq iliornikkut ullukinnerup ullup affaanik sulinngiffiulersinneqarsinnaaneraniq qanorlu aningaasatigut kinguneqarsinnaaneraniq imaqaassaaq. Qulaajaaneq UPA 2025-mi Saqqummiunneqassaaq.

(Inatsisartunut ilaasortaq Peter Olsen, Inuit Ataqtigiit)

Akissuteqaat

(Aningaasaqarnermut Akileraartarnermullu Naalakkersuisoq)

Aappassaaneerinnineq

Ataatsimiititaliaq aalajangiiffigisassatut siunnersuummut isumaliutissiisummik saqqummiussivoq.

Naalakkersuisut UPA2025 sioqqullugu inatsisissatut siunnersuummik, ullukinnerup ullortut sulinngiffiusalernissaanik, peqatigisaanillu Tussiarfissuup sulinngiffiusarunnaarnissaannik malitseqartumik inatsisissatut siunnersuummik saqqummiussinissaannik siunnerfeqartumik Ataatsimiititaliami amerlanerussuteqartut allannguutissatut siunnersuummik saqqummiussippot. Tussiarfissuaq poorskip kingorna sapaatit sisamaat sioqqullugu tallimangornermi nalliussineqartarpoq. Decembarip 21-at decembarilluunniit 22-at ullukinnerusarpoq, nalinginnaasumilli ullukinneq ulloq 21. december nalliussisarparput.

Ataatsimiititaliap allannguutissatut siunnersuutaa pisortat pingaarnertut isumaqatigiissutaanni isumaqatigiissutaannilu, immaqalu aamma namminersortuni, inatsisikkut ilungersunartoqarsinnaanissaanik siunnerfeqarpoq. Taamaalilluni ataatsimiititaliap allannguutissatut siunnersuutaa manna tikillugu isumaqatigiissuteqartarnermi naqisimaneqanngitsumik isumaqatiginninniarinnaatitaanermik, eqqissisimasumik isumaqatigiissuteqartarnermi atuussimasumik ilungersunartoqarnissaa naatsorsuutigineqartariaqarluni.

Ataatsimiititaliap siunnersuutigisaatut inatsimmik suliaqarnissaaq pisariitsuunngitsoq Naalakkersuisut paasisutissiisutigissavaat. Inatsit taamaattoq pissutsinut tulluuttunut ilaatigut isumaliutiginnissaaq:

1. Isumaqatigiissutini tamani ilagiit kalaallit nalliuttuini aningaasarsiaqarluni sulinngiffittut innersuussisuni, Tussiarfissuaq ullortut sulinngiffittut peerneqassaaq. Tamatuma Tussiarfissuup suli sapaataanera allanngortinngilaa, tamannami qallunaat inatsisaanni qanganitsami, kunngip peqqusineratigut taamaallaat atorunnaarsinneqarsinnaasumi aalajangersagaavoq.
2. Ullukinnerup nuna tamakkerlugu sulinngiffiunera inatsimmi allassimassaaq.

3. Inatsit ingerlatsivinnik immikkoortunik isumaliutiginnissaaq, tassani ilaatigut meeqqat atuarfiat ilanngullugu, tassanilu nalinginnaasumik ukiumut ullut atuartitsiviusut 200-t ingerlanneqartarput. Meeqqalli atuarfii amerlasuut aatsaat ulloq 22. decembarimit juullimi sulinngiffeqartarput, tamannalu ulloq 21. december ullortut ilivitsutut affartulluunniit sulinngiffinngortinneqassappat, ilanngullugu isumaliutigineqassaaq. Atuarfinit ulloq 21. december sulinngiffioreersuni, Tussiarfissuup isumaqatigiissutini ullortut sulinngiffittut atorunnaarsinnera ullunik sulinngiffinnik, ilinniartitsisunulluunniit sulinissamut pilersaarutiniq allannguisoqarnissamik pisariaqartitsisoqalerneranik malitseqassaaq. Ilungersunartoq taamaattoq aamma ulluunerani paaqqinniffinni atuuppoq, tassani kommunit ukiuni ullukinnerup sapaatit akunnerisa naaneranniinnerani, ullormik ilivitsumik ammatitsinerunissamut aningaasartuuteqartariaqassapput.
4. Inatsit inatsisinut isumaqatigiissutinullu allanut, Tussiarfissuup ilagiilluunniit sapaataasa innersuussutigineqarnerannut isumaliutiginnittariaqassaaq. Maannakkuugallartoq inatsisit kalluarneqartut suussusersineqanngikkallarput.
5. Inatsit inatsisinut isumaqatigiissutinulluunniit allanut suliffeqarnerup aaqqissuussaananut isumaliutiginnittariaqassaaq, tassani feriarternermut inatsit ilanngullugu. Maannakkuugallartoq inatsisit kalluarneqartut suussusersineqanngikkallarput.

Paatsuungasoqaqqunagu erseqqissaatigineqassaaq suliffeqarnermi illuatungeriit kingorna, tassunga aningaasarsiat aningaasartaanik atuinissaaq kissaatigineqarpat, namminneerlutik Tussiarfissuup sulinngiffiunissaanik isumaqatigiissuteqarsinnaanerat.

Siunnersuutip siullermeerneqarnerani allannguutissatut siunnersuut saqqummiunneqartoq manna siunnersuummi taasissutaasussamit allaanerusoq, ataatsimiititaliap isumaliutissiissummini erseqqissaatigaa. Ataatsimiititaliami amerlanerussuteqartut allannguutissatut siunnersuutaannut tunngatillugu ajornartoorut taanna aamma atuuttoq Naalakkersuisut erseqqissassallu pisussaaffigaat. Naalakkersuisulli, Inatsisartut aalajangiussaat tunngavigalugu, allannguutissatut siunnersuut saqqummiunneqartoq piffissaritinneqartut saqqummiunneqartup iluani atuutilersinniassavaat.

Naalakkersuisut oqaaseqaatit aamma amerlanerussuteqartut allannguutissatut siunnersuutaat tusaatissatut tiguaat.